

[Sápmi](#) 9.10.2015 klo 15:04 | beaivduvvon 9.10.2015 klo 15:09

## Ristenrauna Magga 70 jagi: SámiSoster lea okta mu mánáin

**Ristenrauna Magga devddii mannan vahkus 70 jagi ja ávvudoalut leat otne bearjadaga Anáris. Magga dovdet aktiivvalaš olmmožin sihke searvedoaimmain ja politihkas, muhto buot dehálamos olahus sutnje leamaš sirdit sámegeiela mánáidmánáide.**



Govva: Yle Sápmi

SámiSoster-searvvi vuoddudeaddji ja ságadoalli, sosiálaráđdi, politihkkár, eadni ja áhkku Ristenrauna Magga devddii 70 jagi 4.10.2015.

Magga ávvuda mearkabeaivvis otne bearjadaga 9.10.2015 diibmu 15.00 rájes Sámi oahpahušguovddáža Lássegoađis Anáris. Magga sávvá buohkaid buresbohtin iežas ávvudoaluide.

– Mánát eandalitge dadje, ahte dalle go lea eallimin, galgá suohtas doaluid ordnet. Danin mun jurddašin, ahte lea vuohon áigi ávvudit, go lean ná guhkás joavdan, Ristenrauna Magga muitala mojunjálmmiid.

– Buresboahhtin fal buohkat doaluide boradit ja káfestallat ja eandalitge deaivat olbmuid dohko. Vuoi mii eat álot deaivvat dakkár sajis, ahte leat mieđušteamen soapmása mañimuš mátkái. Ahte livčče vehá suohttasit deaivvadeamit nai, Magga dadjá.

## **Dehálamos: Dat, ahte mánáidmánáin lea sámegiella**

Ristenrauna Magga leamaš máŋggas mielde.

Muhto go sus jearrá dehálamos olahusain, máinnaša son mánáidmánáidis giellamáhtu.

– Dat, ahte mánáidmánáin lea sámegiella. Mánáidmánát leat juohkebeaivválaš ášši, in mun eará astta dahkatge. Dieiguin buđaldit, fitnat váris váccašeamen, dolasteamen – dies dat mis manná áigi.

– Ja dat, ahte lean goittotge nuoraid lihkestuvvan geasuhit ovddidit sápmelaš olbmuid vuoigatvuodaid. Lean hirmat ilus das, Magga muitala.

## **"Heittán dan beaivve, go in hálit šat bargat"**

Ristenrauna Magga dovdet sápmelaččaid sosiála- ja dearvvasvuodasearvvi SámiSostera váibmun.

Searvi lea dehálaš sutnje alces maid.

– SámiSoster lea okta mu mánáin. Mun lean dan vuodđudan ja bálgá gállán, ahte dat lea otná beaivvis.

Maggas lea čielga vástáduš dasa, manin ii leat vel 70-jahkásažžange báhcán doaimmas ealáhahkii.

– Manin mun galggašin veallát searjgas ja vuordit jápmima. Mun hui bures veaján vel bargat. Ii olmmoš galgga heaitit dan ealáhatahkái. Dan beaivve, go in hálit šat bargat, in hálit šat ovddidit SámiSostera inge maidige, de dalle diedusge álggán bargat juoidá eará, Magga čaibmá.

Ristenrauna Magga olles muittašeami sáhtá guldalit [Yle Areenas](#). Jearahallan álgá áiggis 52:36.